

fer seyn / dadurch das Werck verderbet würde : Dann so Kupffer dabey were / würde solches auch mit dem Gold auffsolvirt / vnd damit præcipitirt werden ; welches ein Hinderniß des anzündens oder schlagens seyn würde : Und / so man kein Gold haben kan / das ohne Kupffer ist / so nehme man nur Ducaten oder Rosenobel / dabey kein Kupffer / sondern nur ein wenig Silber seyn soll / welches keinen Schaden bringet / weilen es mit Aqua Regis nicht auffgelöst kan werden / sondern als ein weisses Pulver liegen bleibt / vnd glüe solche auf / biege dieselben in Rollen zusammen / vnd wirff sie in das Aq. Reg. zu solviren : Wann nun alles Gold zu einem geelen Wasser worden vnd abgegossen ist / so schütte Tropfenweise ein reines Oleum Salis Tartari , welches per deliquium gemacht ist / darauff / so wirdt sich das Gold als ein braungeeltes Pulver / von dem widerwärtigen liquore Salis tartari niederschlagen / vnd die solution hell vnd klar werden ; du must aber zusehen / daß du nit mehr Olei tartari zuschüttest / als zu der præcipitation von nöthen ist / sonsten würde sich das nidergeschlagene Gold zum theil wiederumb auffsolviren vnd Schaden bringen. Wann nun das Gold wol niedergeschlagen ist / so giesse das klare Wasser / welches darauff steht / per inclinationem von dem Gold. kalck / vnd giesse ein warm Regen / oder ander süß Wasser wiederumb drauff / rühre solches mit einem reinen Höhllein unterm einander / vnd stelle solches an ein warmen Orth / so lang / biß sich das Gold